

**ՀՀ ֆինանսների նախարարություն
Հարկային և մաքսային մարմինների գանգատարկման հանձնաժողով**

Ո Ր Ո Շ ՈՒ Մ 6/9

1 հուլիսի 2014 թ.

Քննարկվեց Ա/Ձ Շիրակ Հարությունյանի 04.06.2014 թ-ի դիմումով բերված գանգատը սոցիալական ապահովության վճարի գծով առաջադրված պարտավորության դեմ:

Ա/Ձ Շիրակ Հարությունյանի գանգատում բերված փաստարկները.

Կոտայքի ՏՀՏ-ում պարտքերի չափը ճշտելուց հետո Ա/Ձ Շիրակ Հարությունյանը պարզել է, որ սոցիալական ապահովության վճարների գծով ունի 30.000 դրամի պարտավորություն, որը հաշվարկվել է 2012 թ-ի հունիս ամսից մինչև դեկտեմբեր ամիսն ընկած ժամանակահատվածի համար: Մասնավորապես, հուլիս-սեպտեմբեր և հոկտեմբեր-դեկտեմբեր եռամսյակների համար ներկայացվել են արտոնագրեր ստանալու դիմումներ, սակայն պարունակության թերթիկները բացակայելու պատճառաբանությամբ դրանք ետ են վերադարձվել: Արդյունքում, այդ վեց ամիսների համար հաշվարկվել է սոցիալական վճար՝ գումարով 30.000 դրամ:

Ա/Ձ Շիրակ Հարությունյանը խնդրում է առանց վարչական տուգանքի կիրառման ընդունել 2012 թ-ի արտոնագրային վճարի հաշվետվությունները և ազատել սոցիալական վճարների գծով հաշվարկված պարտավորություններից:

ՀՀ ֆինանսների նախարարության հարկային և մաքսային մարմինների գանգատարկման հանձնաժողովի եզրակացությունը.

ՀՀ ֆինանսների նախարարության հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ Ա/Ձ Շիրակ Հարությունյանը պետական ռեսպուստում հաշվառվել է 23.04.2009 թ-ին և ստացել է պետական գրանցման վկայական:

Ա/Ձ Շիրակ Հարությունյանի կողմից 31.04.2012 թ-ին և 31.07.2012 թ-ին փոստային ծառայության միջոցով Կոտայքի ՏՀՏ են ուղարկվել համապատասխանաբար ապրիլ-հունիս և հուլիս-սեպտեմբեր ամիսների համար մարդատար մեքենայով ուղևորափոխադրում իրականացնելու նպատակով արտոնագրային վճար վճարող համարվելու համար դիմում-հայտարարություններ: Սակայն, քանի որ դիմում-հայտարարությունները ներկայացվել են «Հարկերի մասին» ՀՀ օրենքի հավելված 3-ի 6-րդ կետի պահանջների խախտմամբ (բացակայել են պարունակության թերթիկները), դրանք փոստային ծառայության միջոցով ետ են վերադարձվել: Այնուհետև, Ա/Ձ Շիրակ Հարությունյանի կողմից 14.09.2012 թ-ին ներկայացվել է ապրիլ-հունիս ամիսների համար դիմում-հայտարարություն նշումով, որ նա հրաժարվում է սոցիալական ապահովության վճարները վճարելուց: Հետևապես, «Արտոնագրային վճարների մասին» ՀՀ օրենքի 7-րդ հոդվածի համաձայն սոցիալական ապահովության վճարի նվազագույն գումարները (5000-ական դրամ) ապրիլ-հունիս ամիսների համար չեն հաշվարկվել:

31.10.2012 թ-ին փոստային ծառայության միջոցով Ա/Ձ Շիրակ Հարությունյանի կողմից ուղարկվել է նաև հոկտեմբեր-դեկտեմբեր ամիսների համար դիմում-

հայտարարություն, որը ետ է վերադարձվել, քանի որ չեն բավարարել «Արտոնագրային վճարների մասին» ՀՀ օրենքի պահանջները:

Արդյունքում, հուլիս-սեպտեմբեր և հոկտեմբեր-դեկտեմբեր ամիսների համար «Պարտադիր սոցիալական ապահովագրության վճարների մասին» ՀՀ օրենքի 5-րդ հոդվածի 5-րդ կետի համաձայն հաշվարկվել է նվազագույն սոցիալական վճար՝ ընդամենը 30.000 դրամ:

Վերոգրյալի կապակցությամբ հարկ է նշել, որ համաձայն «Արտոնագրային վճարների մասին» ՀՀ օրենքի Հավելված 8-ի 6-րդ կետի. «Հայտարարություն ներկայացնելու օրն անհատ ձեռնարկատերը կամ իրավաբանական անձը ստանում է արտոնագիր սույն հավելվածի N 2 ձևին համապատասխան: Ընդ որում, հայտարարությունը ներկայացնելու օրվա ընթացքում սույն հավելվածի N 2 ձևով արտոնագիր չտրամադրելու դեպքում արտոնագիրը համարվում է տրամադրված հայտարարությունը ներկայացնելու օրը, եթե անհատ ձեռնարկատերը կամ իրավաբանական անձը, սույն հավելվածի 16-րդ կետին համապատասխան, կատարել է արտոնագրային վճարի վճարում»:

Քննարկվող դեպքում Ա/Ձ Շիրակ Հարությունյան կողմից փոստային ծառայության միջոցով Կոտայքի ՏՀՏ են ուղարկվել հաշվետու ժամանակաշրջանների համար մարդատար մեքենայով ուղևորափոխադրում իրականացնելու նպատակով արտոնագրային վճար վճարող համարվելու դիմում-հայտարարությունները, ինչպես նաև մինչև արտոնագրերի ստանալը վճարվել են արտոնագրային վճարի գումարները: Սակայն, պարունակության թերթիկների բացակայության պատճառով Կոտայքի ՏՀՏ կողմից դիմում-հայտարարությունները փոստային ծառայության միջոցով ետ են վերադարձվել:

Հարկ է նշել, որ «Վարչարարության հիմունքների և վարչական վարույթի մասին» ՀՀ օրենքի 5-րդ հոդվածի համաձայն. «Վարչարարություն իրականացնելիս վարչական մարմիններին արգելվում է միայն ձևական պահանջների պահպանման նպատակով անձանց ծանրաբեռնել պարտականություններով կամ մերժել նրանց որևէ իրավունք տրամադրելը, եթե նրանց վրա դրված պարտականությունները բովանդակային առումով կատարված են»:

Հանձնաժողովը գտնում է, որ սովյալ դեպքում գործ ունենք մի իրավիճակի հետ, երբ ըստ էության, «Արտոնագրային վճարների մասին» ՀՀ օրենքով նախատեսված արտոնագիր ստանալու ընթացակարգը Ա/Ձ Շիրակ Հարությունյանի կողմից պահպանվել է: Այսինքն, «Արտոնագրային վճարների մասին» ՀՀ օրենքով Ա/Ձ Շիրակ Հարությունյանի վրա դրված պարտականությունները բովանդակային առումով վերջինիս կողմից կատարվել են:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը

Ո Ր Ո Չ ՈՒ Մ Է՝

Ա/Ձ Շիրակ Հարությունյանի 04.06.2014 թ-ի դիմումով բերված գանգատը բավարարել:

Հանձնաժողովի նախագահ՝



Վ.ՄԻՐՈՒՄՅԱՆ